

LIGJI NR. 08/L -187

PËR PLOTËSIMIN DHE NDRYSHIMIN E KODIT NR. 08/L-032 TË PROCEDURËS PENALE

Kuvendi i Republikës së Kosovës,

Në mbështetje të nenit 65 (1) të Kushtetutës së Republikës së Kosovës,

Miraton:

**LIGJ PËR PLOTËSIMIN DHE NDRYSHIMIN E KODIT NR. 08/L-032 TË PROCEDURËS
PENALE**

**Neni 1
Qëllimi**

Ky Ligj ka për qëllim plotësimin dhe ndryshimin e Kodit Nr. 08/L-032 të Procedurës Penale të Republikës së Kosovës (në tekstin e më tejme Kodi).

Neni 2

Pas paragrafit 4 të nenit 157 të Kodit, shtohen paragrafë të rinj 5. dhe 6. si në vijim:

5. Përjashtimisht afateve të përcaktuara me këtë nen, për veprat penale të dhunimit dhe dhunës në familje të përcaktuara në Kodin Penal, hetimi përfundon brenda afatit prej një (1) viti, nga data e fillimit të hetimit.

6. Në rrethana të ndërlikuara, afati nga paragrafi 5. i këtij neni, mund të zgjatet edhe për gjashtë (6) muaj.”

Neni 3

Pas paragrafit 3 të nenit 310 të Kodit, shtohet paragrafi i ri 4. si në vijim:

4. Përjashtimisht afateve të përcaktuara me këtë nen, për veprat penale të dhunimit dhe dhunës në familje të përcaktuara në Kodin Penal, zbatohen afatet si në vijim:

4.1. në rastet kur shqyrtimi gjyqësor mbahet para gjyqtarit të vetëm gjykues, shqyrtimi gjyqësor duhet të përfundohet brenda gjashtëdhjetë (60) ditësh,

4.2. në rastet kur shqyrtimi gjyqësor mbahet para trupit gjykues, shqyrtimi gjyqësor duhet të përfundohet brenda nëntëdhjetë (90) ditësh.

Neni 4

Pas nenit 98 të Kodit shtohet një nënkapitull i ri si vijon:

NËNKAPITULLI IIIA PROCEDURA TË VEÇANTA NË TRAJTIM TË KRIMEVE KIBERNETIKE

Neni 98A Procedura e ndjekjes

1. Në rastet urgjente dhe kur ka dyshime të arsyeshme në lidhje me përgatitjen ose kryerjen e veprës penale me anë të sistemeve kompjuterike, me qëllim të mbledhjes së dëshmive ose identifikimit të kryerësve, ruajtjes së shpejtë të të dhënave kompjuterike ose të të dhënave që i referohen të dhënave mbi trafikun e të dhënave, duke iu nënshtuar rrezikut të shkatërrimit ose ndryshimit, zbatohen dispozitat procedurale si vijon:

1.1. Në fazën fillestare, ngrirja dhe ruajtja e të dhënave bëhet me kërkesë të organit hetues dhe brenda dyzet e tetë (48) orëve njoftohet Prokurori i Shtetit.

1.2. gjatë hetimit, me kërkesë të organit hetues ruajtja e të dhënave urdhërohet nga prokurori, ndërsa gjatë procedurës gjyqësore me urdhër të gjykatës;

1.3. masa që i referohet paragrafit 1 të këtij neni vlen për periudhën kohore deri në një (1) vit;

1.4. Kërkesa e organit hetues, urdhri i prokurorit ose urdhri i gjykatës dërgohet, menjëherë, tek cilido ofrues i shërbimeve, apo tek ndonjë person që posedon të dhënat, atëherë personi i autorizuar është i obliguar që t'i ngrijë shpejtë ato sipas kushteve të ruajtjes së fshehtësisë;

1.5. në rastin kur të dhënat i referohen trafikut të të dhënave që janë nën posedimin e disa ofruesve të shërbimeve, ofruesi i shërbimeve që i referohet nën-paragrafit 1.4. të këtij paragrafi është i obliguar që menjëherë t'i ofroj organit të hetimit informatat e nevojshme për të identifikuar ofruesit e tjerë të shërbimeve për të qenë në dijeni mbi të gjitha elementet në zinxhirin e shfrytëzuar të komunikimit.

Neni 98B Grumbullimi i të dhënave për abonentin

1. Ofruesit e shërbimeve të internetit, me kërkesë të organit hetues për grumbullimin e të dhënave për abonentin, obligohen që t'i ofrojnë të dhënat për përdoruesin e IP adresës, në pajtim me legjislacionin përkatës për komunikimet elektronike.

2. Grumbullimi i të dhënave për abonentin, përfshirë të dhënat personale dhe adresën fizike, lejohet vetëm për qëllim hetimi apo kur nevojitet përcaktimi i vendndodhjes së të dyshuarit.

Neni 98C Ngrirja dhe ruajtja e të dhënave

1. Në kuadër të bashkëpunimit ndërkombëtar, autoritetet kompetente të huaja mund të kërkojnë nëpërmes pikës së kontaktit ngrirjen dhe ruajtjen e përsheptuar të të dhënave kompjuterike ose të dhënave që kanë të bëjnë me trafikun e të dhënave, që ekzistojnë brenda sistemit kompjuterik në territorin e Kosovës, në lidhje me të cilat autoriteti i huaj ka bërë kërkesë të ndihmës ndërkombëtare ligjore në çështjet penale.

2. Kërkesa për ngrirje dhe ruajtje të të dhënave sipas paragrafit 1 përmban të dhënat në vijim:

2.1. autoritetin që kërkon ngrirjen dhe ruajtjen;

2.2. një prezantim të shkurtër të fakteve që i nënshtrohet hetimit dhe baza ligjore;

- 2.3. të dhënat kompjuterike që kërkohen të ngrihen dhe ruhen;
- 2.4. çdo informatë në dispozicion, e nevojshme për identifikimin e pronarit të të dhënave kompjuterike dhe lokacionit të sistemit kompjuterik;
- 2.5. shërbimi i të dhënave kompjuterike dhe nevoja për t'i ngrirë dhe ruajtur ato;
- 2.6. qëllimin e autoritetit të huaj për të formuluar një kërkesë të ndihmës ligjore ndërkombëtare në çështjet penale.

3. Kërkesa e ngrirjes dhe ruajtjes ekzekutohet sipas nenit 98A të këtij nënkapitulli, për një periudhë prej se paku nëntëdhjetë (90) ditëve. Kjo ruajtje është e vlefshme deri sa vendimi të merret nga autoritetet kompetente, në lidhje me kërkesën e ndihmës ligjore ndërkombëtare në çështjet penale;

Neni 98D

Njoftimi lidhur me ngrirjen dhe ruajtjen e të dhënave të komunikimit

1. Kur gjatë përmbushjes së një kërkesë të bërë sipas nenit 98A të këtij nënkapitulli, për ngrirjen dhe ruajtjen e të dhënave të dërgimit të një komunikate të veçantë, autoriteti kompetent zbulon se një ofruer shërbimesh në një Shtet tjetër ka qenë i implikuar në dërgimin e komunikatës, e njofton menjëherë shtetin kërkues me një masë të mjaftueshme të dhënash për të identifikuar ofruesin e shërbimeve dhe shtegun nëpërmjet së cilit komunikata është transmetuar.
2. Njoftimi i të dhënave sipas paragrafit 1. të këtij neni mund të mos jepet vetëm kur përmbushja e kërkesës mund të cenojë sovranitetin, sigurinë, rendin publik ose interesa të tjera thelbësore.

Neni 98E

Ndihma e ndërsjellët në lidhje me marrjen brenda kohës reale të të dhënave

1. Autoriteti kompetent mund të ofroj ndihmë të ndërsjellë në lidhje me marrjen brenda kohës reale të të dhënave që kanë të bëjnë me njoftimet e veçanta që jepen nëpërmjet një sistemi kompjuterik. Në pajtim me paragrafin 2. të këtij neni, ndihma e ndërsjellët trajtohet sipas kushteve dhe procedurave të parashikuara në legjisllacionin e brendshëm.
2. Autoriteti kompetent jep ndihmë të ndërsjellët të paktën në lidhje me veprat penale për të cilat marrja në kohën reale e të dhënave do të ishte e mundur në çështje të ngjashme të brendshme.

Neni 98F

Ky ligj shfuqizon Ligjin Nr.03/L-166 për Parandalimin dhe Luftimin e Krimit Kibernetik.

Neni 5

Hyrja në fuqi

Ky ligj hyn në fuqi pesëmbëdhjetë (15) ditë pas publikimit në Gazetën Zyrtare të Republikës së Kosovës.

Ligji Nr. 08/L-187
26 tetor 2023

Shpallur me dekretin Nr. DL-178/2023, datë 15.11.2023 nga Presidentja e Republikës së Kosovës Vjosa Osmani-Sadriu